

U organizaciji BH predstavnika proizvođača opreme “Vaillant”, “Grundfos” i “Herz”, održani su na Jahorini 10. po redu “DANI PROJEKTANATA”

U organizaciji BH predstavnika renomiranih proizvođača opreme za grijanje, klimatizaciju i snabdijevanje vodom “Vaillant”, “Grundfos” i “Herz” održani su 03. i 04.11.2016. godine u hotelu “Termag”, Jahorina, 10. po redu - jubilarni “Dani Projektanata”. Na dvodnevnom seminaru preko 60 učesnika iz cijele BiH upoznao se sa novitetima iz proizvodnih asortimana navedenih proizvođača, kao i savremenim rješenjima i trendovima u oblasti termotehnike. Svečani skup su otvorili Semir Botić, direktor Vaillanta, direktor Grundfosa Nenad Lehpaner i Petar Jelić, direktor Herza, koji su se svim gostima u ime organizatora, zahvalili na dolasku.

Admir Delalić, voditelj tehničkog odjela Vaillanta za BiH, govorio je o novom sistemu zagrijavanja tople vode preko solarnih kolektora, tzv. “drain back”. Naime, “Vaillant” kao renomirani proizvođač opreme za grijanje, hlađenje i klimatizaciju je jedini proizvođač koji je napravio sistem “drain back”, a koji povećava efikasnost kod eksploatacije te produžava vijek trajanja same opreme.

Voditelj tehničkog odjela “Vaillant” u Zagrebu, Dalibor Crnić, predstavio je mogućnost novih upravljačkih automatika koje, ne samo da prate napredak tehnologije, nego i uspostavljaju nove standarde u sistemima daljinskog upravljanja, kako za korisnike, tako i za nadzor uređaja od strane ovlaštenih servisa. Do sada su se sličnim upravljačkim jedinicama koristili isključivo veliki snabdjevači energije u cilju nadzora svoje opreme, a od danas tu mogućnost imaju i krajnji korisnici koji, uz pomoć Vaillantovih automatika, ne samo da upravljaju sistemom grijanja, nego svoj sistem mogu povjeriti na održavanje i praćenje ovlaštenim centrima i na taj način povećati udobnost i sigurnost života.

Firma “Herz” ove godine obilježava 120 godina od osnivanja. Tom prilikom, prikazan je i kratki film o razvoju i povijesti firme, a Petar Jelić je nakon toga održao predavanje o kotlovima, koji kao energent koriste drvenu biomasu - sječku i pelet. O primjeni regulacionih ventila u sistemima grijanja, kao i uređajima koji će kod starijih, klasičnih sistema dvocijevnog grijanja omogućiti mjerenje i naplatu toplote prema utrošku, govorila je Sabrina Srkalović, inženjer iz tehničke podrške “Herz” Sarajevo.

Nedim Ićindić, prodajni inženjer iz predstavništva “Grundfos” Sarajevo, predstavio je primjenu pumpi sa promjenjivim protokom u sistemima za recirkulaciju potrošne tople vode. Promjena broja obrtaja i protoka u zavisnosti od temperature vode dovodi do još većih ušteda električne energije. Također, gospodin Ićindić je demonstrirao i korištenje najnovijeg softvera za izbor cirkulacionih pumpi.

Pored odličnih predavanja organizatora, na njihovu molbu, skupu se obratio i inženjer Ljubiša Tanić iz firme “Grijanjeinvest”, koji je kroz konkretne primjere ukazao na izazove sa kojima se projektanti i izvođači susreću u praksi te dao nekoliko preporuka za njihovo prevazilaženje. Svojim izlaganjem je potakao zanimljivu stručnu diskusiju među kolegama projektantima. Nadamo se da će organizatori u idućim godinama, pored stručnih prezentacija, dati još više prostora za ovakvu razmjenu iskustava u i iz struke.

Deseto jubilarno okupljanje na “Danima projektanata” je ponovo pokazalo kolika je potreba i želja inženjera i projektanata mašinske struke da zadrže korak sa novim rješenjima i dostignućima tehnike u svom svakodnevnom radu. Poznavajući organizatore, sigurno je da će se ovaj kontinuitet i nastaviti i u budućnosti.

Uz stručno usavršavanje svi učesnici su imali priliku za razonodu i opuštanje, a ni ovaj put nije izostala tradicionalna zabava u restoranu “Koliba”.